

四庫全書

史部

欽定四庫全書

欽定續通志卷十六

唐紀 十六

僖宗

僖宗皇帝諱僖懿宗第五子也母曰惠安皇后王氏初封普王名儼咸通十四年七月懿宗疾大漸左軍中尉劉行深右軍中尉韓文約定計立普王為皇太子更名僖辛巳懿宗崩皇太子即皇帝位於柩前時年十二以

韋保衡攝冢宰劉行深韓文約居中執政並封國公八月丁未追尊母王氏為皇太后乙卯韋保衡進司徒九月貶韋保衡為賀州刺史加路巖兼侍中王景崇中書令韓君雄張公素天平軍節度使高駢並同平章事君雄仍賜名允中冬十月乙未以尚書左僕射蕭倣為中書侍郎同中書門下平章事再貶韋保衡為澄邁令尋賜死癸卯大赦十一月戊辰以路巖為荆南節度使尚書右僕射蕭鄴同平章事充河東節度使太子少傅于

琮為山南東道節度使十二月以佛骨還鳳翔賧路巖  
為新州刺史

乾符元年春二月甲午葬懿宗皇帝于簡陵癸丑降死  
罪以下趙隱罷以華州刺史裴坦為中書侍郎同中書  
門下平章事三月以京兆尹竇滌為太原尹北都留守  
河東節度使以河東節度使崔彥昭為兵部侍郎充諸  
道鹽鐵轉運使夏四月辛卯以旱慮囚五月乙未裴坦  
薨以刑部尚書劉瞻為中書侍郎同中書門下平章事

以嶺南東道節度使鄭從讜為刑部尚書以吏部侍郎  
韋荷為嶺南東道節度使秋七月以禮部侍郎裴瓚為  
湖南觀察使八月辛未劉瞻薨以兵部侍郎判度支崔  
彥昭為中書侍郎同中書門下平章事右諫議大夫崔胤為  
給事中冬十月劉鄴罷以吏部侍郎鄭畋為兵部侍郎  
翰林學士承旨戶部侍郎盧攜並同中書門下平章事  
十一月庚寅改元羣臣上尊號曰聖神聰睿仁哲孝皇  
帝以蕭倣為司空魏博節度使韓允中卒其子簡自稱

留後以宣慰沙陀六州部落檢校兵部尚書李鈞為靈武節度使雲南蠻寇西川黎州刺史黃景復擊敗之蠻復寇大渡河景復與戰敗績十二月党項回鶻寇天德軍徐州盜起州縣不能禁詔充鄆等道出兵討之蠻陷黎州又寇雅州西川節度使牛勣豫焚城外民居詔發河西河東山南西道東川兵援之仍命天平軍節度使高駢詣西川制置其事

舊書高駢為西川節度使在四月此據通鑑大約舊書自文宗

以下叢雜脫誤而年月更多舛互此駢奏勒回所並據新書及通鑑輯之附識于此

發左右神策長武鎮廊坊河東援兵詔止勒回河東  
兵以韓簡為魏博留後商州民亂逐其刺史王樞以李  
誥為商州刺史捕斬之右軍中尉韓文約以疾致仕是  
歲濮州人王仙芝反

二年春正月丙戌以高駢為西川節度使蠻引去辛卯  
有事于南郊大赦賜文武官階勳爵文宣王及二王後  
三恪一子官以知內樞密田令孜為右軍中尉高駢及  
雲南蠻戰于大渡河敗之蠻請和三月以韓簡為魏博

節度使夏四月浙西突陣將王郢反陷蘇州常州轉掠  
二浙及福建加王景崇兼侍中以吏部侍郎張勗為京  
兆尹東川點檢兵馬使吳行魯為劔南東川節度使以  
東川節度使崔充為河南尹以河南尹李晦為福建都  
團練觀察使五月以太傅分司令狐綯同平章事充鳳  
翔隴右節度使進封趙國公蕭倣薨六月王仙芝及其  
黨尚君長攻陷濮州及曹州天平軍節度使薛崇出兵  
擊之為賊所敗冤句人黃巢亦聚眾應之以吏部尚書



李蔚為中書侍郎同中書門下平章事盧龍軍將李茂  
勲逐其節度使張公素自稱留後秋七月以蝗避正殿  
減膳以大理卿蔡行為豐州刺史天德軍防禦使京北  
尹張勗為天平軍節度使八月以李茂勲為盧龍節度  
使冬十月昭義軍將劉廣逐其節度使高湜自為留後  
以左金吾大將軍曹翔為昭義軍節度使以前大同軍  
使李璠為天德軍豐州西城中城都防禦使十一月詔  
淮南忠武宣武義成天平五軍節度使及監軍使討捕

羣盜十二月王仙芝陷沂州以平盧節度使宋威為諸道行營招討使河南方鎮所遣討賊都將並取處分

三年春正月詔福建江西湖南諸道觀察刺史皆訓練士卒又令天下鄉村各置弓刀鼓板以備寇盜以左金吾衛大將軍齊克讓為充沂海等州節度使二月丙子以旱降死罪以下三月葬暴骸盧龍軍節度使李茂勳立其子可舉為留後自請致仕詔茂勳以左僕射致仕以壽王傑為幽州經畧盧龍等軍觀察押奚契丹等使

李可舉為節度使留後夏四月原州軍亂逐其刺史史懷  
五月庚子以早慮因免浙東西今歲稅以李可舉為盧  
龍節度使六月乙丑以撫王綰為太尉尋薨秋七月以  
前巖州刺史高傑為左驍衛將軍充沿海水軍都知兵  
馬使以討王郢鎮海軍節度使裴瓌及王郢戰敗之加  
韓簡同平章事宋威及王仙芝戰于沂州城下大破之  
八月仙芝陷陽翟郟城詔忠武節度使崔安潛發兵擊  
之以左散騎常侍曾元裕為招討副使守東都又詔山

南東道節度使李福守汝鄆要路仙芝進逼汝州詔邠  
寧節度使李侃鳳翔節度使令狐綯守陝州潼關九月  
乙亥朔日有食之丙子王仙芝陷汝州執其刺史王鐔  
乙酉詔赦王仙芝尚君長罪仙芝陷陽武攻鄭州昭義  
監軍判官雷殷符擊敗之以太府卿李嶧為義成軍節  
度使冬十月王仙芝寇唐州鄆州復攻鄆復二州陷之  
王郢請降以為右率府率十二月王仙芝陷申先廬壽  
舒通等州平盧義昌軍戍安南還至桂州逐其觀察使

李瓚以右諫議大夫張禹謨為桂州觀察使王仙芝寇  
蘄州

四年春正月丁丑降死罪以下二等流人死者聽收葬  
以崔彥昭為司空王郢誘執溫州刺史魯實詔以右龍  
武大將軍宗皓為江南諸道招討使其先徵諸道兵外  
更發忠武宣武感化三道兵益之二月郢寇明州又陷  
台州王仙芝陷鄂州黃巢陷鄆州節度使薛崇死之閏  
月崔彥昭罷以宣武軍節度使王鐸檢校司徒兼門下

侍郎同中書門下平章事王郢伏誅三月黃巢陷沂州  
夏四月壬申朔日有食之陝州軍亂逐其觀察使崔碣  
五月甲子以給事中楊損為陝號觀察使討首亂者誅  
之以芻見避正殿減膳六月以王鐸為司徒江西賊柳  
彥璋陷江州執刺史陶祥以汝州防禦使李鈞為昭義  
軍節度使幽州李可舉請以本軍討沙陀三部落從之  
秋七月黃巢王仙芝合寇宋州八月陷安州乙卯陷隨  
州執刺史崔休徵李福遣其子將兵救隨州死之鹽州

軍亂逐其刺史王承顏沙陀寇雲朔二州冬十月邠寧  
節度使李侃討鹽州亂者平之河中軍亂逐其節度使  
劉侔以京兆尹竇瑬為河中宣慰制置使黃巢寇斬黃  
曾元裕擊敗之十一月己酉以竇瑬為河中節度使尚  
君長降宋威劫殺之黃巢陷匡城遂陷濮州江州刺史  
劉秉仁擒柳彥璋斬之王仙芝寇荆南

五年春正月丁酉陷江陵外郛李福自襄陽馳救之仙  
芝引去壬寅曾元裕與戰于申州敗之罷宋威招討使

以元裕代之潁州刺史張自勉為副使庚戌以高駢為  
荆南節度使兼鹽鐵轉運使二月沙陀陷遮虜軍曾元  
裕及王仙芝戰于黃梅斬之尚君長之弟尚讓率餘衆  
歸于黃巢其別將王重隱陷饒州刺史顏標死之江西  
賊徐唐莒陷洪州加李福同平章事黃巢陷濮州轉寇  
河南三月羣盜陷朗州岳州黃巢自滑州掠宋汴以張  
自勉充東南面行營招討使黃巢寇衛南又寇葉陽翟  
復引兵渡江陷虔吉饒信等州湖南軍亂逐其觀察使



崔瑾夏四月以李國昌為大同軍節度使饒州將彭幼  
璋復饒州徐唐莒伏誅五月丁酉鄭畋盧攜罷以翰林  
學士承旨戶部侍郎豆盧瑑為兵部侍郎吏部侍郎崔  
沆為戶部侍郎並同中書門下平章事李國昌不受命  
寇寧武及奇嵐軍六月以前昭義軍節度使曹翔為河  
東節度使以高駢為鎮海節度使沙陀寇忻州八月陷  
奇嵐軍黃巢寇宣州遂由浙東寇福建諸州九月宋威  
卒辛丑以曾元裕領平盧節度使壬寅曹翔卒李蔚罷

以吏部尚書鄭從讜為中書侍郎同中書門下平章事  
以戶部尚書李都同平章事充河中節度使冬十月詔  
李鈞李可舉與吐谷渾酋長赫連鐸等合兵討沙陀十  
一月以河東宣慰使崔季康為太原尹北都留守河東  
節度使代北行營招討使沙陀寇石州庚戌崔季康救  
之十二月甲戌黃巢陷福州庚辰崔季康李鈞及沙陀李  
克用戰于洪谷敗績鈞死之

新書在廣明元年八月作昭義軍亂殺其節度使李鈞

六年春正月高駢遣兵分道擊黃巢屢破之降其將秦

彥畢師鐸李罕之等巢遂趨廣南二月辛未河東軍亂  
殺其節度使崔季康辛巳以陝虢觀察使高潯為昭義  
軍節度使以郇寧節度使李侶為太原尹北都留守河  
東節度使三月天平軍節度使張勣卒其將崔君裕自  
知州事淄州刺史曹全晟討誅之夏四月庚申朔日有  
食之以王鐸守司徒充荆南節度使南面行營招討都  
統五月以泰寧軍節度使李係為副都統兼湖南觀察  
使秋八月以檢校司空東都留守李蔚檢校司徒同平

章事兼太原尹北都留守河東節度使九月黃巢陷廣  
州嶺南節度使李迢死之冬十月以高駢檢校司徒同  
平章事充淮南節度使江淮鹽鐵轉運江南行營招討  
等使進封燕國公以涇原節度使周寶為鎮海節度使  
以山南東道行軍司馬劉巨容為節度使癸未黃巢陷  
潭州閏月陷澧州刺史李絢死之進逼江陵王鐸趨襄  
陽江陵守將劉漢宏大掠江陵己丑李蔚卒十一月戊  
午以河東行軍司馬康傳圭為河東節度使以定州制

置使王處存為義武軍節度使黃巢趨襄陽劉巨容與江西招討使曹全晟合擊于荆門敗之罷全晟招討使以泰寧都將段彥謨代之黃巢復寇鄂州轉掠饒信池宣歙黃等州十二月貶王鐸為太子賓客分司東都以兵部尚書盧攜為門下侍郎同中書門下平章事太子賓客鄭畋為鳳翔節度使是年朗州賊周岳陷衡州逐其刺史徐顥荆南將雷滿陷朗州刺史崔勣死之石門蠻向瓌陷澧州權知州事呂自牧死之桂陽賊陳彥謙陷

郴州刺史董岳死之

廣明元年春正月乙卯朔改元免嶺南荆湖河中河東  
稅賦十之四戊寅荆南監軍楊復先與段彥謨殺其守將  
宋浩以常滋為節度留後淮南將張潁及黃巢戰于大  
雲倉敗之二月沙陀逼太原陷太谷河東軍亂殺其節  
度使康傳圭壬子以鄭從謙檢校司空充河東節度使  
代北行營招討使三月庚午以左金吾大將軍陳敬瑄  
為西川節度使辛未以旱避正殿減膳以高駢為諸道

行營都統夏四月丁酉以太僕卿李琢為蔚朔等州招  
討都統壬寅張潏饒州以李琢為蔚朔節度使仍充  
都統汝州防禦使諸葛爽為招討副使以神策軍將楊  
師立為劍南東川節度使牛勗為山南西道節度使工  
部侍郎鄭紹業為荆南節度使五月丁巳以諸葛爽為  
振武節度使泰寧軍將劉漢宏反張潏及黃巢戰于信  
州死之六月黃巢陷睦婺宣三州劉漢宏寇申光二州  
秋七月黃巢陷滁和二州辛酉以曹全晟為天平軍節

度使東面副都統劉漢宏請降戊辰以為宿州刺史李  
可舉及李國昌戰于樂兒嶺大敗之國昌與克用奔于  
遼艱九月忠武軍將周發殺其節度使薛能牙將秦宗  
權自稱權知蔡州事冬十月以諸葛爽為夏綏節度使  
黃巢陷申州十一月河中將王重榮逐其節度使李都  
甲寅以劉漢宏為浙東觀察使詔鄭從讜以本道兵授  
諸葛爽及代州刺史朱玫南討黃巢辛酉以王重榮為  
河中留後黃巢陷汝州壬戌如左神策軍閱武以護軍



中尉田令孜為諸道兵馬都指揮制置招討使忠武軍  
監軍楊復先副之丁卯東都留守劉允章叛附于黃巢  
東都陷壬申巢陷虢州以神策軍將羅元杲為河陽節  
度使以周岌為忠武軍節度使田令孜為汝洛晉絳同  
華都統十二月庚辰泰寧軍節度使齊克讓及黃巢戰  
于潼關敗績壬午巢陷潼關闕塞糧料使王師會死之  
把截使兵馬先鋒張承範脫身走巢入華州河中王重  
榮叛附于巢癸未以巢為天平軍節度使甲申貶盧攜

為太子賓客分司東都以翰林學士承旨王徽為戶部  
侍郎戶部侍郎裴澈為工部侍郎同中書門下平章事  
帝與諸王妃主數百騎自金先門西出丙戌左金吾衛  
大將軍張直方等叛附于黃巢巢遂陷京師辛卯車駕  
次鳳翔丙申諸葛爽叛附於巢丁酉車駕至興元詔諸  
道各出全軍收復京師黃巢偕稱尊號豆盧瑑崔沆左  
僕射于琮右僕射劉鄩太子少師裴諗御史中丞趙濠  
刑部侍郎李溥京兆尹李湯將作監鄭綬庫部郎中鄭

係及廣德公主死之王處存以兵入援王重榮去賊復歸引兵營于渭北

中和元年春正月車駕發興元加牛勗同平章事壬申以工部侍郎判度支蕭遘同平章事丁丑車駕至成都二月己卯以太子少師王鐸守司徒同中書門下平章事加高駢京城四面都統鄭從譴侍中依前行營招討使三月辛亥黃巢將朱溫陷鄧州壬子加陳敬瑄同平章事辛酉以鄭畋為京城四面諸軍行營都統聽以墨

敕除官黃巢寇鳳翔畋與戰于龍尾坡敗之王徽罷諸

葛夷奉表自歸以為河陽節度使甲子鄭畋傳檄天下

藩鎮合兵討賊詔召李克用于達靼夏四月以宥州刺

史拓跋思恭權知夏綏節度使

思恭歐陽修五代史作思敬陳後山談叢云拓

跋思恭思敬兄弟也而五代史誤作一人今考舊唐書

舊五代史宋史及通鑑其興破黃巢者皆作拓跋思恭

或作李思恭而拓跋思敬在歐史又見于前蜀世家為

武定節度使文苑英華亦載有張元晏授李思敬武定

軍節度使制文據歐史李仁福傳思敬卒于乾寧二年

國不應至天復二年而思敬尚在洋州也又考五代史

纂誤所錄李仁福傳之凡今之作思敬者俱作思恭且

意洋州之思敬為其族人則疑吳氏時史本本是思恭

欽定四庫全書

卷十六

而後人以宋譚敬字展轉改  
寫遂誤混兩人為一人也

黃巢將王玫據邠州通塞

鎮將朱玫起兵誅之涇原節度使程宗楚朔方節度  
使唐弘夫及黃巢戰于咸陽敗之壬午巢遁丁亥復入  
京師宗楚弘夫死之以王重榮為河中節度使五月甲  
子李克用掠太原振武節度使契苾璋敗之王重榮高  
渌克華州六月辛卯邠寧節度副使朱玫及黃巢戰于  
興平敗績戊戌鄭畋為司空同中書門下平章事都統  
如故鄆賊鍾季文陷明州秋七月丁巳大赦改元庚申

以翰林學士承旨兵部侍郎韋昭度同中書門下平章  
事丙寅神策軍將郭琪反伏誅辛未田令孜殺左拾遺  
孟昭圖以王處存為東南面行營招討使朱玫為邠寧  
節度使八月感化軍將時溥逐其節度使支詳自稱留  
後高潯及黃巢戰于石橋敗績巢復陷華州九月辛酉  
封子震為建王臨海賊杜雄陷台州昭義軍將成麟殺  
其節度使高潯己巳孟方立殺成麟自稱留後永嘉賊  
朱褒陷温州冬十月鳳翔行軍司馬李昌言逐其節度

使鄭畋十一月以昌言為鳳翔節度行營招討使鄭畋  
裴澈罷遂昌賊盧約陷處州十二月以時溥為感化軍  
節度使是歲霍丘鎮使王緒反陷壽州光州

二年春正月辛亥王鐸為諸道行營都都統權知義成  
軍節度使承制封拜太子少師崔安潛副之高駢罷都  
統辛未以王處存拓跋思恭鄜延節度使李孝昌為京  
城東南北面都統以右神策觀軍容使西門思恭為行  
營都都監楊復光為南面行營都監二月黃巢陷同州

已卯以太子少傅鄭畋為司空同中書門下平章事召

赴行在以李昌言為京城西面都統朱玫為河南都統

諸谷防遏使

胡三省曰朱玫時鎮邠寧安得出關東統河南諸鎮此河南蓋自龍門河東至蒲津

一帶大河南岸也

三月邛州蠻阡能反李克用陷蔚州夏五月

加高駢兼侍中罷鹽鐵轉運使六月以涇原留後張鈞

為節度使以朱玫為京城西北面行營都統西川部將

楊行遷及阡能戰于乾溪敗績秋七月己巳以撫州刺

史鍾傳為江西觀察使以保大軍留後東方達為節度



使京城東北面行營都統拓跋思恭為京城四面都統  
閏月加韓簡兼侍中八月以兵部侍郎鄭紹業同平章  
事兼荆南節度使劉漢宏寇浙西杭州刺史董昌遣兵  
馬使錢鏐擊敗之韓簡陷孟州九月丙戌黃巢將朱溫  
以同州降以為右金吾衛大將軍河中行營招討副使  
賜名全忠嶺南西道軍亂逐其節度使張從訓平盧軍  
將王敬武逐其節度使安師儒自稱留後冬十月嵐州  
刺史湯羣叛附于沙陀韓簡寇鄆州曹全晟拒之敗死

其將崔用自稱留後十一月荆南軍亂牙將陳儒自稱  
留後丙子湯羣伏誅王鐸以墨敕召李克用赴難克用  
以兵趨河中十二月以克用為雁門節度使庚戌王景  
崇卒以其子鎔為成德軍留後是歲孟方立遷其軍于  
邢州南城賊危全諷陷撫州危仔倡陷信州廬州將楊  
行密逐其刺史郎幼復和州刺史秦彥逐宣歙觀察使  
竇滈

三年春正月以李克用為京城東北面行營都統乙亥

王鐸罷二月壬子李克用合河中義武忠武軍與尚讓

戰于梁田陂敗之魏博軍亂逐其節度使韓簡其將樂

彥禎自稱留後

考異曰舊傳簡攻河陽為諸葛爽所敗單騎奔迴憂憤疽發背而卒時中和元

年十一月也新傳亦同今從實錄

己未以建王震為太保三月壬申李

克用王重榮及尚讓戰于零口敗之己丑以朱全忠為

宣武軍節度使癸巳李克用克華州夏四月甲辰及黃

巢戰于渭橋大敗之巢遁去丙午復京師五月以鄭畋

為司徒以鄭從謹為司空同中書門下平章事以李克

用檢校司空同平章事兼太原尹北都留守河東節度使王處存檢校司徒王重榮檢校司空俱同平章事餘如故朱全忠檢校司空朱玫東方逵俱同平章事王鐸檢校太師中書令進封晉國公楊復光加開府儀同三司淮南將張瓌陷復州奉國軍節度使秦宗權叛附于黃巢秋七月以朱全忠為東北面都招討使鄭畋罷以兵部尚書裴澈同中書門下平章事以王鎰為成德軍節度使樂彥稠為魏博節度使賜陳敬瑄鐵券八月甲辰

以前振武軍節度使李國昌為代北節度使以湖南觀察

使閔勗為欽化軍節度使

時升湖南為欽化軍

黃巢秦宗權寇陳

州淮南將韓師德陷岳州九月以時溥為東面兵馬都

統冬十月全椒賊許勑陷滁州李克用取潞州李國昌卒

十一月壬申劍南西川行軍司馬高仁厚及阡能戰于

邛州敗之十二月忠武軍將鹿晏弘陷興元逐其節度

使牛勗自稱留後

舊書牛勗作牛蔚蔚舊五代史俱作牛叢考叢與蔚俱牛僧孺子新書叢

傳不言鎮興元蔚傳惟言為山南西道節度使以吳行魯代還亦不言為鹿晏弘等所逐也此從新紀作勗然

宦者傳則  
又作頊云  
是歲天平軍將曹存寶克鄆州

四年春正月以鹿晏弘為興元留後婺州將王鎮執其  
刺史黃碣二月鎮伏誅浦陽鎮將蔣瓌陷婺州舒州賊  
吳迴逐其刺史高瀛三月甲子楊師立反以陳敬瑄為  
西川東川山南西道都指揮招討使前杭州刺史路審  
中陷鄂州夏五月辛酉朱全忠及黃巢戰敗之辛未李  
克用及巢戰于窰向又敗之癸酉以高仁厚為劍南東  
川節度使討楊師立壬午福建團練使陳巖逐其觀察

鄭鑑自稱留後六月壬辰楊師立伏誅以高仁厚為東  
川節度使乙卯赦劍南三川瘞京城骸骨秋七月壬午  
黃巢伏誅加李克用階特進封隴西郡王八月克用請  
以弟克修為昭義軍節度使由是昭義分為二鎮九月  
己未加朱全忠同平章事鹿晏弘反冬十月以蕭遘為  
司空十一月鹿晏弘陷許州殺節度使周岌自稱留後  
以義成軍節度使王鐸為義昌軍節度使  
時橫海軍更號義昌軍  
十二月甲午荆南行軍司馬張瓌逐其節度使陳儒自

稱留後盜殺王鐸于漳南是歲濮州刺史朱宣逐天平  
軍節度使曹存實自稱留後武昌軍將杜洪陷岳州以  
鳳翔留後李昌符為鳳翔節度使

光啟元年春正月己卯車駕發成都庚辰荆南軍將成  
汭陷歸州是月王緒陷汀漳二州南康賊盧光稠陷虔  
州秦宗權寇潁川亳州朱全忠與戰于焦夷敗之三月丁  
卯至自成都己巳大赦改元以時溥為蔡州四面行營  
兵馬都統討秦宗權李可舉攻易州以蕭邁為司徒韋



昭度為司空閏月秦宗權寇荆南以朱全忠為西北面  
行營都統夏四月吳迴伏誅秦宗權陷襄州山南東道  
節度使劉巨容奔于成都武當賊馮行襲陷均州以田  
令孜為左右神策十軍使五月羣臣上尊號曰至德光  
烈皇帝六月盧龍軍將李全忠殺其節度使李可舉自  
稱留後壬戌秦宗權陷東都秋七月義昌軍亂逐其節  
度楊全孜牙將盧彥威自稱留後以保鑒都將曹誠檢  
校太保充義昌軍節度使八月光州人王潮執王緒甲

寅殺右補闕常溶樂彥禎殺洛州刺史馬爽九月王重榮以河中拒命詔朱玫討之冬十月癸丑朱全忠及秦宗權戰于雙丘敗績十一月李克用叛合于王重榮重榮攻同州刺史郭璋死之十二月癸酉朱玫及王重榮李克用戰于沙苑敗績乙亥克用進逼京師丙子帝如鳳翔

二年春正月辛巳朔李克用還軍河中表請大駕還宮仍數田令孜之罪戊子田令孜劫帝如興元癸巳朱玫

反以兵追逼乘輿帝發寶雞以楊晟為感義軍節度使  
李昌符叛合于朱玫車駕入散關二月辛亥以田令孜  
為西川監軍以前東都留守鄭從謹為太傅三月壬午  
山南西道節度使石君涉棄鎮奔鳳翔合于朱玫遂州  
刺史鄭君雄陷漢州丙申車駕至興元戊戌以翰林學  
士承旨兵部尚書杜讓能刑部尚書孔緯並為兵部侍  
郎同中書門下平章事保鑾都將李鋌楊守亮等敗朱  
玫軍于鳳州夏四月壬子朱玫李昌言奉嗣襄王愲權

監軍國事攻自為大丞相兼左右神策十軍使以燭入  
于京師五月庚辰燭僭即皇帝位遣戶部侍郎楊涉宣  
諭江淮吏部侍郎夏侯潭宣諭河北諸藩鎮多受其僞  
署惟義武宣武河東河中拒不受

按新書四月朱玫以  
襄王燭入于京師十

月自立為皇帝十二月伏誅燭傳不著月日第云燭即  
僞位凡九月敗新紀與傳不合舊紀自四月監軍國事  
至十二月燭敗凡九月也六月己酉以扈蹕都將楊守亮為金商節

度使淮西將黃皓殺欽化節度使閔勗衡州刺史周岳  
陷潭州自稱節度使朱玫將王行瑜率邠寧河西之師

屯鳳州保鑾都將李鋌李茂貞陳珮等拒之於大唐峰  
秋七月戊寅秦宗權陷許州殺鹿晏弘以楊守亮檢校  
司徒充山南西道節度使王行瑜寇興州守亮擊敗之  
八月王潮陷泉州盧龍軍節度使李全忠卒其子匡威  
自稱留後九月戊寅王行瑜陷興鳳二州楊守亮敗郃  
軍於鳳州冬十月義成軍亂逐其節度使安師儒師儒  
奔汴州朱全忠殺之遂攻滑州據之以全忠兼領義成軍  
節度使丙辰董昌攻越州劉漢宏奔台州是月河陽節度

使諸葛爽卒其子仲方自稱留後神策行營先鋒使滿  
存克興鳳二州武寧軍將張雄陷蘇州十一月庚子秦  
宗權陷鄭州十二月壬子台州刺史杜雄執劉漢宏降  
于董昌昌自稱浙東觀察使丙辰朱玫伏誅丁巳襄王  
煬伏誅秦宗權陷孟州諸葛仲方奔汴州是歲天平軍將  
朱瑾逐泰寧軍節度使齊克讓自稱留後杜洪陷鄂州  
自稱武昌軍節度留後

三年春正月乙亥以邠州都將王行瑜為邠寧慶節度

使保鑾都將李鋌檢校司空充黔中節度使扈蹕都頭  
李茂貞為武定軍節度使楊守宗為金商節度使保鑾  
都將陳珮為宣歙觀察使右衛大將軍顧彥朗為東川  
節度使二月戊辰削田令孜官爵三月癸未蕭遘裴澈鄭  
昌圖以罪伏誅壬辰車駕至鳳翔鄭從讜罷以韋昭度  
為司空癸巳鎮海軍將劉誥逐其節度使周寶自稱留  
後夏四月甲辰六合鎮遏使徐納陷蘇州逐其刺史張  
雄甲子淮南兵馬使畢師鐸陷揚州執其節度使高駢

五月甲戌宣歙觀察使秦彥入于揚州癸未秦宗權陷  
鄭州六月河陽將李罕之入于孟州張全義入于東都  
己酉李昌符復反庚戌犯大安門不克出奔隴州以李  
茂貞為隴州招討使丁巳護國軍將常行儒殺其節度  
使王重榮重榮兄重盈自稱留後秋七月丁亥降死罪  
以下李昌符伏誅以李茂貞檢校司空同平章事充鳳  
翔節度使八月以韋昭度為太保壬子朱全忠取曹州  
九月以戶部侍郎張璠為兵部侍郎同中書門下平章



事秦彥殺高駢冬十月丁未朱全忠取濮州甲申封子  
陞為益王杭州刺史錢鏐取常州是月秦宗權將孫儒  
寇揚州十一月壬申廬州刺史楊行密入于揚州十二  
月癸巳淮西將趙德諲陷江陵殺荆南節度使張瓌饒  
州刺史陳儒取衢州上蔡賊馮德章陷蘄州

文德元年春正月孫儒殺秦彥畢師鐸癸亥以朱全忠

為蔡州四面行營都統

考異曰編遺錄二月丙戌奉唐  
帝正月二十五日制命授蔡州

四面行營都統則丙戌乃全忠受詔之日復錄薛居正  
五代史皆云丙戌因此而誤也舊紀五月丁酉制以

金忠為蔡州都 二月魏博軍亂殺其節度使樂彥禎其  
統月日尤誤

將羅弘信自稱留後乙亥帝不豫己丑至自鳳翔庚寅  
謁太廟大赦改元韋昭度孔緯杜讓能並賜號持危啟  
運保乂功臣左右神策十軍觀軍容使楊復恭進封魏國  
公賜號忠貞啟聖定國功臣李罕之攻絳州又攻晉州  
張全義襲河陽入之遂兼領河陽節度使三月戊戌朔  
日有食之壬寅帝疾甚立壽王傑為皇太弟勾當軍國  
事癸卯皇帝崩於武德殿年二十七諡曰惠聖恭定孝

皇帝廟號僖宗陵曰靖陵

僖宗乾符六年廣明一年中和四年光啟三年文  
德一年凡十五年

欽定續通志卷十六

欽定四庫全書

欽定續通志卷十七

唐紀十七

昭宗一

昭宗皇帝諱晔懿宗第七子僖宗同母弟也

新書作母曰恭憲皇

太后王氏后妃傳惠安王后生僖宗而恭憲王后自生昭宗舊書后妃傳有惠安無恭憲而昭宗追上尊號亦云加惠安為恭憲則祇是一人今從之始封壽王名傑乾符三年授開府

儀同三司領幽州大都督幽州盧龍等軍節度押奚契

丹管內觀察處置等使僖宗遇亂再出奔壽王握兵符  
侍左右尤見倚信文德元年三月僖宗疾大漸羣臣以  
吉王長欲立之觀軍容使楊復恭率兵迎壽王於六王  
宅入居少陽院立為皇太弟改名敏乙巳即皇帝位於  
柩前韋昭度攝冢宰帝體貌明粹有英氣喜文學以僖  
宗威令不振朝廷日卑有恢復前烈之志尊禮大臣號  
令天下踐阼之始中外皆忻忻焉朱全忠敗魏軍於內  
黃李克用攻河陽夏四月庚午追尊帝母惠安太后曰

恭憲以韋昭度為中書令孔緯為司空壬午孫儒陷揚州自稱淮南節度使復攻宣州朱全忠遣其將救河陽河東軍引去以丁會為河陽留後張全義復為河南尹成汭陷江陵自稱留後辛卯朱全忠及秦宗權戰於蔡州敗之五月壬寅趙德諲以襄州降以德諲為忠義軍節度使蔡州四面行營副都統李茂貞加檢校侍中六月閬州防禦使王建陷漢州遂寇成都徵陳敬瑄為龍武統軍以韋昭度檢校司徒門下侍郎平章事充劔南

西川節度兩川招撫制置使秋七月李罕之引河東兵  
攻河陽丁會擊却之以鳳州防禦使滿存為節度使同  
平章事以魏博留後羅弘信為節度使八月戊辰朱全  
忠克蔡州南城冬十月孟方立襲遼州李克修擊敗之  
辛卯葬僖宗皇帝於靖陵陳敬瑄拒命十一月朱全忠  
及時溥戰於吳康鎮敗之全忠取宿州丙申秦宗權陷  
許州辛酉奉國軍將申叢執秦宗權十二月丁亥以韋  
昭度為行營招討使永平軍節度使王建充行營都指

揮使討陳敬瑄

時以邛州置永平軍

山南西道節度使楊守厚陷

夔州

龍紀元年春正月癸巳朔大赦改元以翰林學士承旨  
兵部侍郎劉崇望同中書門下平章事奉國軍將郭璠  
殺其留後申叢自稱留後二月己丑秦宗權伏誅三月  
以孔緯為司徒杜讓能為司空丙申錢鏐取蘇州加蔡  
州節度使趙犇同平章事充忠武軍節度使夏四月壬  
戌以朱全忠為檢校太尉中書令進封東平王六月李



克用取磁洛二州邢磁洛節度使孟方立卒其弟還自  
稱留後李克用進攻邢州楊行密攻宣州取之殺宣歙  
觀察使趙鐸詔以行密為宣歙觀察使廬州刺史蔡儔叛  
附于孫儒冬十月已卯平盧軍節度使王敬武卒其子  
師範自稱留後以太子少師崔安潛檢校太傅兼侍中

充平盧軍節度使王師範殺棣州刺史張蟾

按張蟾之  
敗舊書在

大順二年二月又按新書於此等爭殺之事例云某  
陷某州某官死之意謂合春秋之法其實當藩鎮吞噬  
之時一彼一此惟力是視失守殞命本無節烈之可言  
即如此張蟾之事第以青師已死子又甚少觀覲建節

力屈就斃初非有忠君奉國之心他如克用全忠等爭  
城爭地類多自得自環奪者而新書例以寇若陷書之此  
正如刺如幾所謂以此而擬春秋貌同心異者也  
茲故曰拔曰取曰殺皆據事直書而著其說於此楊行  
密取常州殺其刺史杜稜錢鏐取潤州十一月己酉有  
事於南郊帝更名曰暉大赦十二月壬申眉州刺史山  
行章叛附于王建壬午孫儒陷常州及潤州以孔緯為  
太保杜讓能為司徒

大順元年春正月戊子朔羣臣上尊號曰聖文睿德光  
武弘孝皇帝大赦改元李克用克邢州孟遷降之壬寅

簡州將杜有遷執其刺史員虔嵩叛附於王建二月丁巳率百官料錢修國學己未資州將侯元綽執其刺史楊戡叛附于王建乙丑加朱全忠守中書令朱全忠將龐師古及孫儒戰於陵亭敗績三月戊申昭義節度使李克修卒李克用表其弟克恭知留後事夏四月丙辰李克用將安金俊攻雲州防禦使赫連鐸求援於幽州李匡威以兵赴之戰於蔚州河東軍大敗宿州將張筠逐其刺史張紹光附于時溥溥軍於碭山全忠擊敗之

乙丑蜀州刺史任從海與王建戰于邛州敗績丙寅嘉  
州刺史朱寶叛附於王建丙子戎州人文武堅執其刺  
史謝承恩叛附於王建五月削李克用官爵屬籍以張  
濬為河東行營都招討宣慰制置使京兆尹孫揆副之  
鎮國軍節度使韓建為北面行營招討都虞候兼供軍  
糧料使朱全忠為南面招討使王鎔為東面招討使李

匡威為北面招討使赫連鐸副之以討李克用

謹按通鑑輯覽

御批  
克用固非始終忠于唐室之人然既有興復功豈宜首  
議削除爾爾時朝命本不能致討特欲籍力三鎮徒快其

并吞私計耳然使克用果滅則三鎮益彊仍為國患矧克用又未易即滅而徒授之口實卒之一博不勝轉不得不屈體調停使諸藩效尤勝制是直甘心澁鳩自斃范祖禹死疾庸醫之喻猶不足盡之 壬寅昭義軍

亂殺其節度使李克恭其將安居受自稱留後附於朱全忠壬子都招討使張濬率神策諸軍五十二都及邠寧鄜夏之師合五萬人發京師癸丑劔南東川節度使顧彥朗卒其弟彥暉自稱留後削李罕之官爵六月以孫揆為昭義軍節度使仍充招討副使辛酉雅州將謝從本殺其刺史張承簡叛附於王建辛未以朱全忠兼

領宣義軍節度使充河東東面行營招討使以滄州刺史盧彥威為義昌軍節度使河東將安知建以邢洺磁三州叛附于朱全忠秋七月官軍至陰地關朱全忠將葛從周入潞州以從周權充兵馬留後戊申李克用襲執昭義軍節度使孫揆揆死之楊行密取潤州八月孫儒復奪取之錢鏐殺蘇州刺史杜孺休楊行密取蘇州九月李克用取潞州楊行密取潤常二州閏月孫儒復取常州進圍蘇州壬戌邳州將任可知殺其刺史毛湘

冬十月癸未蜀州將李行周逐其刺史徐公鉢附于王

建加邠寧節度使王行瑜侍中佑國軍節度使張全義

同平章事

時于東都  
置佑國軍

韓建襲河東軍於趙城敗績李克

用取邢洺磁三州十一月丁卯李匡威取蔚州張濬及

李克用戰于陰地敗績孫儒取蘇州十二月李克用取

晉州朱全忠擊魏博取黎陽臨河淇門衛縣庚午尚書

右僕射王徽卒

二年春正月丙辰朱全忠及羅弘信戰于內黃敗之弘

信興和全忠軍還庚申孔緯張濬罷以翰林學士承旨崔  
昭緯為兵部侍郎御史中丞徐彥若為戶部侍郎並同  
中書門下平章事復李克用檢校太師太原尹北都留  
守河東節度觀察處置等使再貶太保荆南節度使孔  
緯為均州刺史鄂岳觀察使張濬為連州刺史甘露鎮  
使陳可言取常州錢鏐取蘇州二月加李克用守中書  
令再貶張濬繡州司戶復李罕之官爵乙巳赦陳敬瑄  
丁未詔王建罷兵不受命三月辛亥以王師範為平盧



節度使李克用表以李存孝為邢洺磁節度使夏四月  
甲申以星變大赦避正殿減膳徹樂賜兩軍金帛贖所  
畧男女還其家民年八十以上及廢疾不能自存者長  
吏存卹訪武德功臣子孫庚子韋昭度以王建知劍南  
西川節度留後兼行營招討使昭度歸京師癸卯王建  
攻成都以武安軍節度使周岳為嶺南西道節度使時  
欽化軍為李克用攻雲州五月孫儒取滁和二州六月  
武安軍揚行密復奪取之丙午封子祐為德王

按吳鎮曰昭宗諸子德王名裕

不名祐也況乾寧四年立為皇太子時名裕即可見此  
誤也考舊書光化三年劉季述幽帝東宮矯詔命太子  
即皇帝位明年昭宗反正制皇太子裕降為德王改名  
祐吳鎮云不名祐者誤也但新書於始封時名祐立皇  
太子時名裕紀傳皆不載  
改名始末是其闕畧耳  
秋七月李克用克雲州表其

將石善友為大同防禦使孫儒焚揚州以逃八月朱全

忠攻宿州入其郭辛丑王建克成都執陳敬瑄九月乙

卯六軍十二衛觀軍容使左神策軍中尉楊復恭以上

將軍致仕冬十月壬午朱全忠取宿州癸未以王建為

劍南西川節度使楊復恭謀反命天威都將李順節神

策軍使李守節討之玉山軍使楊守信拒戰軍潰復恭  
奔興元復恭假子山南西道節度使楊守亮武定軍節  
度使楊守忠龍劔節度使楊守貞綿州刺史楊守厚同  
舉兵反十一月己未曹州將郭銖殺其刺史郭詞附於  
朱全忠辛未全忠取壽州十二月乙酉朱全忠將丁會  
及朱瑾戰於金鄉敗之戊子殺李順節以顧彥暉為劔  
南東川節度使

景福元年春正月己未朱全忠逐河陽節度使趙克裕

以張全義兼領河陽節度使丙寅大赦改元王鎔李匡  
威合兵攻堯山李克用擊敗之二月劉崇望罷以李茂  
貞為山南西道招討使甲申朱全忠攻鄆州天平軍節  
度朱宣擊敗之趙德諱卒以其子匡凝為忠義軍節度  
使三月以戶部尚書鄭延昌為中書侍郎同中書門下  
平章事乙巳楊行密取楚州又取常州殺陳可言丙辰  
楊守忠楊守貞楊守厚攻梓州丙寅福建觀察使陳巖  
卒其將范暉自稱留後庚午泉州刺史王潮攻福州夏

四月西川將李簡擊楊守忠等敗之辛巳以杜讓能為

太尉乙酉以錢鏐為武勝軍防禦使

舊書在龍紀元年七月考方鎮表龍

紀元年置杭州防禦使景福元年賜杭州防禦使號武勝軍意錢鏐當龍紀時已為防禦使而賜軍號後則為

武勝軍防禦也舊書蓋誤而加王行瑜兼中書令六月以武勝軍為武威軍更誤矣

楊行密及孫儒戰于揚州擒斬之秋七月己巳李茂貞

攻鳳州感義軍節度使滿存奔于興元茂貞進攻興洋

二州皆取之八月壬申攻興元楊守亮及滿存奔閬州

以楊行密為淮南節度使同平章事丙戌降京畿關輔

囚罪免淮南浙西宣州逋負李茂貞以其子繼密知興  
元府事九月加成納同平章事冬十月淮南將蔡儔以  
廬州河東將李存孝以邢州皆附於朱全忠十一月辛  
丑武寧軍將張燧張諫以濠泗二州附于朱全忠乙巳  
朱全忠取濮州孫儒將王壇攻婺州取之十二月壬午  
王建擊楊守亮於閬州破之

二年春正月時溥攻宿州刺史郭言戰死以李茂貞為  
山南西道兼武定軍節度使以徐彥若同平章事充鳳

翔節度使茂貞不受命二月楊行密取常州加王建同平章事李克用攻邢州辛巳及王鎔戰於毗日嶺敗之朱全忠敗朱瑾兵於徐州李匡威敗李克用兵于元氏克用還攻邢州三月辛酉盧龍軍兵馬留後李匡籌逐其

兄匡威自稱節度留後夏四月乙亥王建殺陳敬瑄及田令

孜丁亥王鎔殺李匡威

考異曰實錄殺匡威在五月恐約奏到舊紀六月乙卯幽州李

匡威謀害王鎔恒州三軍攻匡威殺之舊傳唐太祖紀年錄皆云五月新紀四月丁亥按匡籌奏云四月十九

日是月巳巳朔十九日丁亥也

戊子朱全忠克徐州時溥自焚死朱全

忠以宋州刺史張廷範知感化留後五月庚子王潮破  
福州殺范暉自稱留後閏月以錢鏐為蘇杭觀察使以  
扈諱都頭曹誠為黔中節度使耀德都頭李鋌為鎮海  
軍節度使宣威都頭孫惟晟為荆南節度使六月以捧  
日都頭陳珮為嶺南東道節度使並同平章事秋七月  
王鎔救邢州李克用與戰於平山敗之壬申進攻鎮州  
鎔請助攻邢州克用合鎔兵進屯任縣丁亥楊行密取  
廬州殺蔡儔加天雄軍節度使李茂莊同平章事

時以  
秦州



為天雄軍八月丙申以嗣覃王嗣周為京西路招討使神策

大將軍李錡副之以討李茂貞楊行密取歙州九月丙寅以錢鏐為鎮海軍節度浙江西道觀察處置等使移軍額於杭州乙亥覃王率禁軍三萬送徐彥若赴鎮壬午及李茂貞王行瑜戰于興平敗績李茂貞進逼京師甲申殺觀軍容使西門君遂內樞密使李周潼段誦茂貞陳兵臨臯驛貶太尉平章事晉國公杜讓能為梧州刺史壬辰以東都留守韋昭度為司徒御史中丞崔胤為

戶部侍郎並同中書門下平章事昇州刺史馮弘鐸以  
州附于揚行密冬十月乙未殺杜讓能及戶部侍郎杜  
弘徽十一月以李茂貞守中書令進封秦王兼興元尹  
山南西道節度使賜王行瑜號尚父仍賜鐵券以徐彥  
若為御史大夫以泉州刺史王潮為福建觀察使十二  
月以韋昭度為太傅邵州刺史鄧處訥攻潭州克之殺  
周岳處訥自稱留後是歲建州刺史徐歸範汀州刺史  
鍾全慕並附于王潮

乾寧元年春正月乙丑朔大赦改元李茂貞以兵來朝以李匡籌為盧龍節度使二月以右散騎常侍鄭榮為禮部侍郎同中書門下平章事以鄧處訥為武安軍節度使彰義軍節度使張鈞卒其兄鐸自稱留後朱全忠及朱宣朱瑾戰于東阿敗之三月甲申李克用克邢州執李存孝殺之克用以馬師素權知邢洺團練使夏五月孫儒將劉建鋒襲潭州殺鄧處訥自稱留後王建克彭州殺成戎節度使楊晟辛卯鄭延昌罷武岡指揮使蔣

勛取邵州六月壬辰李克用克雲州殺赫連鐸甲午以  
張廷範為感化軍節度使戊午以翰林學士承旨禮部  
尚書李磻為戶部侍郎同中書門下平章事庚申磻罷  
以徐彥若為中書侍郎同中書門下平章事秋七月李茂  
貞克閬州楊復恭楊守亮楊守信出走以雨霖避正殿  
減膳鄭綮罷楊守厚卒其將常再榮以綿州附於王建  
八月楊復恭楊守亮楊守信走至乾元韓建捕獻之伏  
誅癸巳滅京畿興元洋金商等州賦役九月庚申李克

用殺其昭義軍節度使康君立

新書作李克用陷潞州昭義軍節度使康君立

死之按君立本克用將克用以君立攻取潞州即令鎮之則潞州久為克用所據此以李存孝之死殺君立而新書乃以陷潞州及死之為文殊失事實冬十月封子衮為棣王禩虔王禔

沂王禕遂王十一月李克用取武州以張鐸為彰義軍節度使十二月李克用取新州壬子及李匡籌戰于居庸大敗之甲寅匡籌奔滄州盧彥威殺之丙辰克用取幽州是冬楊行密取黃州

二年春正月己巳以給事中陸希聲為戶部侍郎同中

書門下平章事壬申護國軍節度使王重榮卒其子珂  
自稱留後二月乙未以太子太傅李磻為戶部侍郎同  
中書門下平章事李克用表劉仁恭為盧龍軍兵馬留  
後三月崔胤李磻罷以戶部侍郎王搏為中書侍郎同  
中書門下平章事加王鎔兼侍中楊行密取潯州浙東  
節度使董昌僭號建年錢鏐請以本軍討之夏四月陸  
希聲韋昭度罷朱瑾及朱全忠戰于高梧敗績庚寅楊  
行密取壽州又襲連水軍取之戊戌以劉建鋒為武康

軍節度使五月削董昌官爵甲子李茂貞王行瑜韓建等各以兵犯京師殺太保致仕韋昭度太子少師李璣是月李克用克絳州殺其刺史王瑤六月庚寅以錢鏐為浙江東道招討使壬辰以太子賓客孔緯為吏部尚書守司空門下侍郎同中書門下平章事秋七月丙辰李克用以兵屯河中戊午匡國軍節度使王行約奔於京師庚申神策軍護軍中尉駱全瓘劉景宣指揮使王行實李繼鵬反帝聞亂登承天門樓遣諸王率禁兵禦之

捧日都頭李筠以本軍於樓前侍衛李繼鵬率鳳翔兵  
攻筠帝乃下樓與親王公主內人出啓夏門趣南山宿莎  
城鎮以薛王知柔權知中書事及置頓使壬戌李克用  
入同州徐彥若王搏崔昭緯至莎城甲子帝次石門鎮  
遣知樞密院劉光裕薛王知柔還京師制置守衛宮禁  
丙寅李克用遣使奉表問起居丁卯帝遣中使賈詒詣  
克用軍令與王珂各起兵赴新平又詔張鐸以涇原兵  
控扼鳳翔以前護國軍節度使崔胤為中書侍郎同中



書門下平章事壬午李克用發河中八月己丑至渭橋  
癸巳敗邠寧軍於梨園擒其將王令陶以獻又詔保大  
軍節度使李思孝以本軍進討丁酉削王行瑜官爵以  
李克用為邠寧四面行營都招討使定難軍節度使李  
思諫充北面招討使彰義軍節度使張鐠充西面招討  
使護國軍節度留後王珂充行營糧料使李茂貞斬李  
繼鵬傳首行在詔赦茂貞罪辛丑改授李克用邠寧四  
面行營都統又以河中都監袁李貞充邠寧四面行營

兵馬都監押辛亥帝至自石門壬子崔昭緯罷以王珂  
檢校司空充護國軍節度使幽州兵馬留後劉仁恭檢  
校司空充盧龍軍節度使丙辰以徐彥若為司空與王  
搏崔胤並賜號扶危匡國致理功臣癸亥孔緯薨以前  
昭義軍節度使李罕之為邠寧四面副都統冬十月丙  
戌賊右僕射崔昭緯為梧州司馬李克用及王行瑜戰  
于黎園敗之庚寅王行約焚寧州以逃克用奏以匡國  
軍節度使蘇文建為靜難軍節度使癸卯朱全忠圍克

州義武軍節度使王處存卒其子部自稱留後以京兆尹孫偓為戶部侍郎同中書門下平章事李克用攻龍泉寨李茂貞救之李罕之擊敗茂貞十一月丁巳李克用拔龍泉寨齊州刺史朱瓊附于朱全忠丁卯李克用入邠州王行瑜伏誅朱全忠敗秦寧軍于鉅野丁丑王建取利州李克用旋軍渭北加蘓文建同平章事十二月癸未赦京師復大順以來削奪官爵非其罪者甲申李克用進封晉王改賜忠貞平難功臣閬州防禦使李

繼雍蓬州刺史費存渠州刺史陳璠附於王建乙未加  
李罕之兼侍中丙申王建攻梓州戊戌通州刺史李彥  
昭附於王建辛亥李克用旋師太原李茂貞以其將胡  
敬璋為河西節度使加錢鏐兼侍中安州防禦使家晟  
襲桂州殺靜江軍節度使周元靜晟自稱知軍府事

三年春正月癸丑王建取龍州以戶部尚書兼京兆尹  
嗣薛王知柔檢校司徒充清海軍節度使閏月丁亥果  
州刺史周雄附於王建李克用遣兵救充鄆軍於莘魏

博節度使羅弘信擊敗之二月壬子以通王滋為開府儀同三司判侍衛諸軍事三月以天雄留後李繼徽為節度使保大軍節度使李思孝致仕以其弟思敬為保大留後朱全忠伐鄆州敗其兵於馬頰夏四月壬午武安軍亂殺其節度使劉建鋒其將馬殷自稱兵馬留後滑州河湓朱全忠因決為二渠李克用攻魏州五月董昌去帝號復稱節度使辛巳賜崔昭緯自盡癸未楊行密取蘄州又取光州庚寅成汭取黔州甲午錢鏐攻越

州乙未克之己亥董昌伏誅加錢鏐檢校太尉中書令  
朱全忠救魏州六月與李克用戰於洹水敗之克用引  
軍還庚戌李茂貞犯京師嗣延王戒丕帥禁軍禦之丙  
寅及茂貞戰於婁館敗績秋七月壬辰茂貞進逼京師  
諸王率禁軍奉車駕以如太原癸巳次渭北韓建表請  
駐華州以建為京畿都指揮安撫制置催促諸道綱運  
等使甲午次富平韓建來朝乙未次下邳丙申至華州  
以府署為行宮乙巳崔胤罷丙午以翰林學士承旨陸

宸為戶部侍郎同中書門下平章事八月癸丑以王建

為鳳翔四面行營招討使甲寅王搏罷以錢鏐權領浙

江東道軍州事乙丑以國子毛詩博士朱朴為左諫議

大夫同中書門下平章事九月己卯朱全忠張全義表

請建都洛陽庚辰以王潮為威武軍節度使

時升福建觀察使為

威武軍乙未以武安軍節度使崔胤為中書侍郎翰林學

士承旨崔遠為兵部侍郎並同中書門下平章事丁酉

貶陸宸為硤州刺史己亥以孫僊為鳳翔四面行營都

統靜難軍節度使李思諫副之李思敬為保大軍節度使以韓建檢校太尉兼中書令充修復宮闕京畿制置催促諸道綱運等使李克用及朱全忠戰于宗城敗之冬十月壬子加孫僊為鳳翔行營節度招討使丁巳以韓建權知京兆尹兼把截使戊午以威勝軍節度使王搏為吏部尚書同中書門下平章事李茂貞上表請罪仍獻助修京闕錢師遂不行以錢鏐為鎮海威勝兩軍節度使李克用及羅弘信戰于白龍潭敗之加王珂同



平章事十一月戊子忠國軍節度使李師悅卒其子繼

徽自稱留後

時以湖州置忠國軍

四年春正月甲申韓建以兵圍行宮勒諸王歸十六宅散遣所領軍士其甲兵並歸收掌殺扈蹕都將李筠丙申朱全忠克鄆州天平軍節度使朱宣出走追獲之朱全忠以龐師古為天平軍留後己亥孫偓罷都統以李思諫為寧塞軍節度使二月戊申朱全忠克兗州泰寧軍節度使朱瑾奔于淮南朱全忠以葛從周為泰寧軍

留後全忠又取沂海密三州保義軍節度使王珙攻河中韓建殺太子詹事馬道殷將作監許巖士以楊行密為江南諸道行營都統癸丑王建取瀘州己未立德王祐為皇太子更名裕大赦享於行廟辛酉王建取渝州

乙亥孫僊朱朴罷

宰相表作己亥是年正月丁丑朔二月丙午朔則二月不應有己亥茲據

通鑑

三月丙子朱全忠表朱友裕為天平留後龐師古為

武寧留後宣武軍將楊師厚敗王珂兵于猗氏河東將李嗣昭敗王珙兵于猗氏又敗之於張店以蘇文建為

昭武軍節度使夏四月以同州防禦使李繼瑋為匡國

軍節度使五月壬午朱全忠取黃州執其刺史翟章

新書

紀誤作

六月甲寅貶王建為南州刺史乙卯以李茂貞

夏璋

為西川節度使嗣覃王嗣周為鳳翔節度使茂貞不受

命嗣周及茂貞戰於奉天敗績秋七月加成汭兼侍中

以李繼徽為靜難軍節度使庚寅錢鏐取蘇州八月韓

建殺通王滋儀王韶王彭王惕嗣韓王嗣陳王嗣覃王

嗣周嗣延王戒丕嗣丹王允睦王濟王

新書無睦王濟王舊書只八王

有賧濟而無韋延丹茲依唐書糾繆所列又新書儀王  
作沂王種糾繆亦同考昭宗子沂王種于天順二年為  
朱全忠所殺則此合  
從舊紀作儀王也 九月癸酉王建圍梓州李克用伐

幽州辛巳攻安塞軍劉仁恭擊敗之錢鏐取湖州以彰  
義軍節度使張璠為鳳翔西北行營招討使李思諫副  
之以討李茂貞削茂貞官爵復其姓名為宋文通復以  
王建為西川節度使同平章事加義武節度使王郜同  
平章事李繼瑋棄同州奔于鳳翔冬十月以韓建充匡  
國軍節度使壬子遂州刺史侯紹乙卯合州刺史王仁

威並附於王建庚申王建克梓州東川節度使顧彥暉

自殺王建以邛州刺史王宗滌為東川留後甲子封子

祕為景王祚為輝王祺為祁王

舊書在二月又有補封雅王祥封瓊王之文考

諸王傳雅王瓊王於光化元年封不在是年又舊書祁

王祺作祺雅王正作補考補封端王在天祐元年非雅

王也又按唐諸王封國大率繫地為號光化二年始

于碭山置輝州而此已有輝王豈特取美名而不以地

繫者加張璉同平章事十一月癸酉揚行密及朱全忠

戰于清口敗之丁巳錢鏐取台州朱全忠奏以檢校司

空泰寧軍留後葛從周為泰寧軍節度使潁州刺史王

敬菟為武寧軍節度使十二月丁未威武軍節度使王潮卒其弟審知自稱留後貶右拾遺張道古為施州司戶

光化元年春正月以徐彥若為司徒加王師範同平章事以兵部尚書劉崇望同平章事充劍南東川節度使以昭信防禦使馮行襲為節度使以韓建為修宮闕使二月赦李茂貞復其姓名官爵三月己丑以王審知為威武留後以朱全忠兼領宣義天平軍節度使以馬殷

為武安留後盧龍節度使劉仁恭襲滄州盧彥威出走  
仁恭以其子守文為義昌軍留後夏四月丁未朱全忠  
及李克用戰于鉅鹿加王珂兼侍中丙寅立淑妃何氏  
為皇后丁卯朱全忠拔洺州殺其刺史邢善益五月己  
巳朔大赦辛未朱全忠拔邢州殺其刺史袁奉韜以葛  
從周為邢洺磁留後以武定節度使李繼密為山南西  
道節度使劉崇魯還為兵部尚書以王宗滌為東川留  
後馬殷取邵衡永三州六月以濠州刺史趙瑫為忠武

軍節度使秋七月加武貞軍節度使雷滿同平章事鎮  
南軍節度使鍾傳兼侍中丙申朱全忠取唐州又取隨  
州八月庚戌改華州為興德府戊午朱全忠取鄧州已  
未車駕發華州壬戌至自華州甲子大赦改元九月戊  
辰以韓建守太傅中書令充興德尹封潁川郡王賜鐵  
券建辭王爵改封許國公加王鎔兼中書令羅弘信加  
侍中進封臨清郡王甲甲錢鏐取蘇州冬十月羅弘信  
卒其子紹威自稱留後癸卯以王審知為威武軍節度使



張全義加侍中以王宗滌為東川節度使朱全忠殺安  
州刺史武渝十一月甲寅封子正為雅王祥為瓊王以  
羅紹威為魏博節度使衢州刺史陳岌附于楊行密十  
二月癸未潞州節度使薛志勤卒澤州刺史李罕之襲  
潞州取之附于朱全忠全忠表罕之為昭義軍節度使  
李克用取澤州

二年春正月乙未給復綿劍二州二年丁未兵部尚書  
陸扆為兵部侍郎同中書門下平章事崔胤罷李罕之

取沁州劉仁恭拔貝州屠之進攻魏州二月朱全忠取  
蔡州三月朱全忠救魏州丁未及劉仁恭戰于內黃大  
敗之丁巳朱全忠取澤州夏五月李克用攻潞州朱全  
忠擊敗之六月以李罕之為河陽三城節度使以河陽  
節度使丁會為昭義軍節度使丁丑李罕之卒保義軍  
亂殺其節度王珙其將李璠自稱留後秋七月壬辰海  
州戍將陳璠以州附於楊行密馬殷取道州八月李克  
用取澤潞懷三州冬十一月徐彥若為太保王搏為司

空馬殷取郴連二州辛丑保義軍將朱簡殺李璠自稱  
留後附於朱全忠十二月加羅紹威同平章事

三年春二月庚申加王建勲中書令壬申加王審知同  
平章事壬午以吏部尚書崔胤充清海軍節度使夏四  
月戊午朱全忠羅紹威合兵攻滄州辛未皇后及皇太子  
謁九廟六月丁巳朱全忠表以朱簡為保義軍節度  
留後仍改名友諒丁卯以崔胤為尚書左僕射兼門下  
侍郎同中書門下平章事王搏罷再貶崖州司戶尋賜

死秋七月以昭義留後孟遷為節度使兵部尚書劉崇  
望卒戊申以雷滿檢校太保封馮翊郡王武泰軍節度  
使趙崇封天水縣開國子乙卯以王建兼劍南東川武  
信軍兩道都指揮制置等使忠義軍節度使趙匡凝檢  
校太師兼中書令八月己巳以前歸義軍節度副使張  
承奉為歸義節度使庚辰李克用攻沼州克之葛從周  
邀擊於青山口大敗之從周進攻鎮州壬午成汭檢校  
太師中書令甲申以崔胤為開府儀同三司進封魏國

公九月朱全忠取洺州錢鏐取婺州衢州刺史陳友附  
於錢鏐乙巳徐彥若罷丙午崔遠罷戊申以刑部尚書  
裴贄為中書侍郎同中書門下平章事甲寅朱全忠克  
瀛州冬十月丙辰克景州辛酉克莫州辛巳克祁州癸  
未以朱友謙為保義軍節度使甲申朱全忠克定州義  
武軍節度使王郜奔於太原十一月庚寅左右神策軍  
中尉劉季述王仲先內樞密使王彥範薛齊偓作亂皇  
帝居於少陽院辛卯季述等以皇太子裕為皇帝奉皇

帝為太上皇皇后為太上皇后殺睦王倚十二月戊辰  
朱全忠自定州還汴州遣使與崔胤謀討賊

欽定續通志卷十七

欽定四庫全書

欽定續通志卷十八

唐紀十八

昭宗二

昭宣帝

天復元年春正月乙酉神策軍將孫德昭董彥弼周承  
誨以兵討亂皇帝復于位劉季述王仲先王彥範薛齊  
偓伏誅黜皇太子為德王丙戌以孫德昭同平章事充  
靜海軍節度使賜姓名李繼昭丁亥崔胤進位司空己



丑朱全忠械送程巖至京師伏誅庚寅以周承誨為嶺南西道節度使賜姓名李繼誨董彥弼為寧遠軍節度使賜姓李並同平章事與李繼昭俱留宿衛癸巳進朱全忠爵東平王加李茂貞尚書令兼侍中進爵岐王戊申朱全忠取絳州壬子取晉州二月甲寅朔以旱避正殿減膳李克用取澤州己未朱全忠攻河中戊辰執護國軍節度使王珂尋殺之全忠以張存敬為河中留後辛未封全忠為梁王以翰林學士戶部侍郎王溥為中

書侍郎吏部侍郎裴樞為戶部侍郎同中書門下平章  
事加劉仁恭羅紹威並兼侍中三月辛亥朱全忠取沁  
州壬子取澤州進攻潞州降其節度使孟遷夏四月丁  
巳取遼州己未拔承天軍甲戌帝享于太廟丙子大赦  
改元武德貞觀功臣子孫叙進之予鄴公介公後一子  
官免畿內光化以來逋負朱全忠攻太原李克用與戰  
於洞渦敗之全忠乃還五月癸卯以朱全忠為宣武宣  
義天平護國四鎮節度使己酉加錢鏐守侍中張全義

兼中書令六月李克用取隰慈二州閏月以孟遷為河陽三城節度使以河陽節度使丁會為昭義軍節度使秋八月楊行密攻杭州冬十月戊戌朱全忠稱兵向闕錢鏐敗楊行密之兵于青山戊申朱全忠至河中十一月己酉鳳翔宿衛軍使李繼筠勒兵闕下諸軍大掠朱全忠至同州匡國留後司馬鄴降之壬子左神策軍中尉韓全誨劫帝如鳳翔是夕次鄠縣韓建以華州附于朱全忠癸丑李茂貞迎車駕于田家塋丁巳朱全忠以

韓建為忠武軍節度使趙珣為匡國軍節度使以前商  
州刺史李存權知華州辛酉以兵部侍郎盧光啓權勾  
當中書事壬戌車駕至鳳翔癸亥李茂貞及朱全忠戰  
于武功敗績丁卯以盧光啓為右諫議大夫參知機務  
戊辰朱全忠至鳳翔軍于城東辛未移兵趣邠州甲戌  
崔胤裴樞罷乙亥朱全忠攻邠州丁丑靜難軍節度使  
李繼徽降之復其姓名曰楊崇本十二月戊戌全忠攻  
藍屋屠之清海軍節度使徐彥若卒表以行軍司馬劉

隱為留後戎昭節度使馮行襲殺中使之徵兵江淮者  
武貞軍節度使雷滿卒子彥威自稱留後

二年春正月癸丑朱全忠屯三原李克用遣其將李嗣  
昭周德威攻慈隰晉等州丁卯以給事中韋貽範為工  
部侍郎同中書門下平章事丙子以給事中嚴龜為岐汴  
和協使二月戊寅朱全忠還軍河中李嗣昭攻慈隰下  
之進逼晉絳乙未朱全忠將氏叔琮敗河東兵于蒲縣  
盜發簡陵王建取利州三月戊午氏叔琮擊李嗣昭軍

敗之復取慈隰二州進攻太原丁卯叔琮引兵還李克  
用復取慈隰二州以金吾將軍李儼為江淮宣諭使以  
楊行密為東面行營都統中書令吳王以討朱全忠加  
馬殷同平章事夏四月辛丑回鶻請發兵赴難盧光啓  
罷楊行密取昇州五月己未朱全忠發河中趣鳳翔李  
茂貞與全忠將康懷英戰于武功敗績庚午韋貽範罷  
錢鏐進爵越王六月丙子以中書舍人蘇檢為工部侍  
郎同中書門下平章事甲申李茂貞及朱全忠戰于號縣

敗績丙戌朱全忠拔鳳州丁亥進逼鳳翔秋七月甲辰  
朱全忠拔成州乙巳拔隴州復攻秦州不克八月己亥  
韋貽範起復保大軍節度使李茂勛帥師救鳳翔朱全  
忠擊走之辛丑王建攻興元山南西道節度使李繼密  
降之以王宗滌為山南西道節度使九月戊申李茂貞  
及朱全忠戰于槐林敗績武定軍節度使拓跋思恭以  
洋州附于王建癸亥以李茂貞為鳳翔靜難武定昭武  
四鎮節度使冬十月王建取興州丁亥朱全忠表迎車

駕已且以詔賜全忠十一月癸卯李茂勛復以兵援鳳翔朱全忠遣兵襲鄜坊士子入坊州甲寅入鄜州以李暉權知軍府事李茂勛遁去丙辰韋貽範薨十二月李茂勛遣使請降于朱全忠更名周彝是歲盧光稠攻嶺南取韶州

三年春正月丙午王師範取兗州戊申殺左右神策軍中尉韓全誨張彥宏內樞密使袁易簡周敬容及李繼筠李繼誨李彥弼辛亥以翰林學士姚洎為汴岐和協



使壬子以工部侍郎崔胤為司空兼門下侍郎同中書  
門下平章事甲子車駕出鳳翔如朱全忠軍是夕次岐  
山己已至自鳳翔哭於太廟大赦庚午崔胤及朱全忠  
殺中官七百餘人辛未以胤兼判六軍十二衛事二月  
壬申詔停在鳳翔一切所除官甲戌貶陸扆為沂王傅  
分司東都丙子王溥罷朱全忠殺蘇檢吏部侍郎盧光  
啓戊寅賜朱全忠回天再造竭忠守正功臣降京師河  
中鳳翔府同鄆郿三州死罪以下己卯以輝王祚為諸

道兵馬都元帥庚辰朱全忠為太尉中書令副之以崔  
胤為司徒裴樞為清海軍節度使壬辰以朱友裕為鎮  
國軍節度使乙未以朱友倫為左軍宿衛都指揮使戊  
戌朱全忠歸鎮以裴樞為門下侍郎同中書門下平章  
事三月朱全忠攻青州夏四月己卯以朱全忠判元帥  
府事王師範求援于淮南乙未楊行密遣其將王景仁  
赴之又遣別將攻宿州全忠遣康懷英救之淮南兵引  
還五月壬子成汭及楊行密戰于君山敗死雷彥威襲

江陵陷之以潁州刺史朱友恭檢校司空充武寧軍節度使王景仁合萊州刺史王師誨兵攻密州拔之六月乙亥朱全忠取登州丙子王師範王景仁及朱友寧戰于石樓敗之友寧戰死秋七月朱全忠至臨朐王師範與戰敗績全忠復取密州八月庚辰加王建守司徒進爵蜀王九月癸卯朱全忠將楊師厚及王師範戰于臨朐敗之楊行密殺奉國軍節度使朱延壽辛亥朱全忠拔棣州殺其刺史邵播戊午王師範降于朱全忠冬十月楊行

密攻潤州朱全忠取兗州以康懷英為泰寧軍節度使  
朱友倫死朱全忠以其兄子友諒代典宿衛忠義軍將  
趙匡明襲江陵陷之自稱留後王建取忠萬施三州甲  
戍取夔州十二月裴贄罷楊行密克宣州殺寧國軍節  
度使田頔辛巳以禮部尚書獨孤損為兵部侍郎同中  
書門下平章事丙申朱全忠殺尚書左僕射張濬

天祐元年春正月乙巳崔胤罷以裴樞判左三軍事充  
鹽鐵轉運使獨孤損判右三軍事兼判度支以兵部尚

書崔遠為中書侍郎翰林學士左拾遺柳璨為右諫  
議大夫並同平章事己酉朱全忠殺太子少傅崔胤及京  
兆尹鄭元規威遠軍使陳班戊午全忠遷唐都于洛陽  
壬戌車駕發長安二月乙亥次陝州丙子朱全忠自河  
中來朝甲申封子禎為端王祈豐王福和王禧登王祐  
嘉王三月丁未以朱全忠兼判左右神策及六軍諸衛  
事全忠奏以長安為佑國軍以韓建為節度使以鄭州  
刺史劉知俊為匡國軍節度使丁巳帝遣間使如河東

淮南西川告急夏四月全忠趣駕東行閏月丁酉車駕  
發陝州壬寅全忠逆於新安殺醫官使閻祐之司天監  
王墀內都知韋周晉國夫人可證等甲辰至自西都享  
於太廟乙巳大赦改元詔討李茂貞楊崇本戊申以蔣  
玄暉為宣徽南院使兼樞密使王殷為宣徽北院使兼  
皇城使張廷範為金吾將軍充街使以韋震為河南尹  
兼六軍諸衛副使又徵武寧軍節度使朱友恭為左龍  
武統軍保大軍節度使氏叔琮為右龍武統軍癸丑以

張全義為天平軍節度使乙卯以朱全忠為宣武宣義  
護國忠武四鎮節度使錢鏐更封吳王羅紹威進爵鄴  
王五月以陝州為興唐府丙寅加河陽節度使張漢瑜  
同平章事辛未朱全忠還鎮六月李茂貞楊崇本王建  
傳檄合兵以討朱全忠全忠以鎮國軍節度使朱友裕  
為行營都統保大軍節度使劉鄩屯兵同州秋七月朱全  
忠以兵屯河中庚寅建凌煙閣圖畫朱全忠八月壬寅  
全忠令朱友恭氏叔琮將玄暉以兵入宮至寢殿是夕

皇帝崩年三十八謚曰聖穆景文孝皇帝廟號昭宗明年改謚曰恭靈莊閔廟號襄宗後唐同光初復故謚號陵曰和陵

昭宗龍紀一年大順二年景福二年乾寧四年光化三年天復三年天祐一年凡十六年

昭宣帝諱柷昭宗第九子也母曰積善太后何氏始封輝王名祚天復三年拜開府儀同三司充諸道兵馬元帥朱全忠已弑昭宗矯詔立為皇太子改名柷監軍國



事天祐元年八月丙午皇太子即皇帝位於柩前己酉  
追削昭儀李漸榮河東夫人裴貞一為悖逆庶人以龍  
武牙官史太為棣州刺史以酬其弑逆之功庚戌羣臣  
上表請聽政乙丑皇帝見羣臣於崇勲殿西廊下衡州  
刺史陳璋睦州刺史陳詢並以州附楊行密九月己巳  
以裴樞充大行皇帝山陵禮儀使獨孤損充山陵使兵  
部侍郎李燕充鹵簿使韋震充橋道使宗正卿李克勤  
充按行使庚午尊皇后曰皇太后辛巳改以權河南尹

張廷範充山陵橋道使並兼頓遞應接等使冬十月辛卯朔日有食之癸巳朱全忠自河中來朝甲午復檢校

太保左龍武統軍朱友恭姓名為李彥威貶崖州司戶

貶檢校司徒右龍武統軍氏叔琮為白州司戶

舊書作貝州司

戶今考其謫詞云謫掾選方若貝州在河北道不可謂之選方也茲依通鑑尋賜自盡是日

全忠歸鎮丙申復以朱全忠為宣武宣義護國天平四

鎮節度使張全義為河南尹充忠武軍節度使判六軍

諸衛事朱友裕卒於行營十一月楊行密攻光州又攻

鄂州朱全忠率師救之行密乃還是歲虔州刺史盧光

稠卒其將李圖自稱知州事

五代史記盧光稠卒于梁開平五年而通鑑又在開

平四年皆與此異以劉隱為清海軍節度使

天祐二年

新舊紀但書二年今依通鑑加天祐號按嗣君踐阼年改元正也昭宣帝畏朱全忠

不敢改元止以先君舊號紀歲月然其來亦有所自如代宗之廣德改于肅宗寶應之二年七月文宗之太和改於敬宗寶曆之三年二月懿宗之咸通改於宣宗大中之十四年十一月雖俱只在即位之次年然其久者乃至歷十六年始改則亦無怪春正月楊行密克潤州

昭宣帝之因仍而蒙以終世矣

殺安仁義丁丑盜焚乾陵下宮朱全忠攻壽州不克二

月辛卯還師壬辰以前保大軍節度使劉鄩為金吾衛

大將軍充右街使兵馬指揮使朱漢賓為右羽林統軍

以李振為平盧軍留後楊行密克鄂州殺杜洪戊戌朱

全忠殺德王裕棣王昶虔王禔沂王禔遂王禕景王禕

祁王祺雅王正瓊王祥

新書無沂王雅王舊書昭宗十子傳亦作殺德王以下六王帝

紀則云九王而不書其名茲據通鑑書之又新紀德王名作禕考昭宗子名皆從示似當作禕為是然昭宗子

別有顯王禕新書亦惟此作禕其餘皆作裕也己酉葬昭宗皇帝於和陵三月

庚午以前平盧節度使王師範為河陽三城節度使甲

子裴樞罷戊寅獨孤損罷以禮部侍郎張文蔚為中書  
侍郎同中書門下平章事甲申崔遠罷以吏部侍郎楊  
涉為中書侍郎同中書門下平章事加劉隱同平章事  
夏四月壬辰以檢校司徒和王傳張廷範為太常卿乙  
未以旱避正殿減膳丙午以前棣州刺史劉仁遇檢校  
司空充泰寧軍節度使辛亥降京畿死罪以下給復山  
陵役者一年五月癸酉貶新除靜海軍節度使獨孤損  
為棣州刺史尚書左僕射裴樞登州刺史右僕射崔遠

萊州刺史乙亥貶吏部尚書陸扆為濮州司戶工部尚  
書王溥淄州司戶庚辰貶檢校司徒守太保致仕趙崇  
為曹州司戶兵部侍郎王贊為濮州司戶辛巳再貶裴  
樞為隴州司戶獨孤損為瓊州司戶崔遠為白州司戶  
王建取金州昭信軍節度使馮行襲奔於均州六月行  
襲復取金州揚行密克婺州戊子朱全忠殺裴樞獨孤  
損崔遠陸扆王溥趙崇王贊及朝士貶官者三十餘人  
己丑貶司空致仕裴贇為青州司戶尋殺之壬辰敕諸

道管內有新除朝官前資朝官敕到三日內督遣赴闕  
秋七月卜郊辛酉賜全忠迎鑾記功碑癸亥貶太子賓  
客柳遜為曹州司馬岳州刺史鄧進忠以州附于馬殷  
八月乙未削趙匡凝官爵遣武寧軍節度使楊師厚率  
師擊之己亥朱全忠自以親軍赴之處州刺史盧約取  
温州楊師厚收唐鄧復郢隨均房等州九月甲子趙匡  
凝出兵陣於漢濱師厚擊敗之傳其城下匡凝出走遂  
克襄州丙寅封弟禔為潁王祐蔡王

新書帝紀及諸王  
傳祐俱作祐通鑑

亦同考昭宗子德王裕本名祐且天祐元年又見嘉王祐而此蔡王復名祐乃事之必不然者茲據宗室世系表

輯丁卯荆南節度使趙匡明棄城走其將王建武以荆

州降于朱全忠全忠以賀瓌為荆南留後以楊師厚為

山南東道節度使己巳改武成王廟為武明王乙酉改

卜郊冬十月丙戌以朱全忠充諸道兵馬元帥別開幕

府以全忠家諱改金州昭信軍為戎昭軍

謹按通鑑輯覽

御批改軍號以避逆臣家諱可謂冠履倒置庸懦若此

安得不為天下所輕唐室凌夷至是蓋亦無足論矣

甲午

議駁昭宗諡號丁未改題神主癸丑改成德軍為武順



軍自餘縣名有信字城字犯朱全忠祖父名者並改之  
十一月庚午三卜郊庚辰淮南節度使揚行密卒以其  
子渥為節度副大使東面諸道行營都統兼侍中弘農  
郡王辛巳以朱全忠為相國總百揆進封魏王加九錫  
十二月全忠辭魏王九錫之命丁酉殺蔣玄暉及豐德  
庫使應瑒尚食使朱建武庚子省樞密及宣徽南院使  
獨置宣徽使一員以王殷為之趙殷衡為副使癸卯以  
柳璨為司空戊申朱全忠弒皇太后于積善宮又殺宮

人阿秋阿虔已酉敕以太后喪廢朝三日收所上皇太后  
寶冊追廢為庶人遣官告郊廟庚戌敕罷來年上辛謁  
郊廟禮癸丑貶柳璨為登州刺史太常卿張廷範為萊  
州司戶甲寅斬璨于上東門外車裂張廷範于都市  
三年春正月乙卯朱全忠以四鎮之師會河北諸軍屯  
于深州壬戌淮南將王茂章以宣歙二州附于錢鏐錢  
鏐取睦州以茂章為鎮東節度副使己巳魏博節度使  
羅紹威殺其衙內親軍八千人庚午朱全忠自內黃入

于魏州二月揚渥取岳州癸巳王建取歸州三月戊寅  
以朱全忠領諸道鹽鐵轉運使判度支部事充三司  
都制置使夏四月癸未朔日有食之鎮南軍節度使鍾  
傳卒其子匡時自稱留後魏博牙將史仁遇作亂據高  
唐朱全忠討平之李克用攻邢州不克劉守文攻貝州  
又攻冀州朱全忠擊走之六月以京兆尹佑國軍節度  
使韓建為平盧節度使以平盧節度使王重師為京兆  
尹秋七月揚渥取饒州己未朱全忠自魏州歸大梁八

月甲辰全忠復以兵攻滄州錢鏐克衢州九月揚渥克  
洪州執鍾匡時楊崇本攻夏州匡國軍節度使劉知俊  
擊敗之擒坊州刺史劉彥暉是月以霖雨崇于都門冬  
十月丙戌王建立行臺于蜀承制封拜李克用攻潞州  
以救滄州戊戌楊崇本及劉知俊戰于美原敗績十一  
月劉知俊康懷英攻鄜延等州克之加知俊同平章事  
以懷英為保義軍節度使忠國軍節度使高彥卒其子  
灋自稱留後十二月錢鏐以王茂章領寧國軍節度使

閏月戊辰昭義軍節度使丁會以澤潞降于李克用克用以李嗣昭為昭義留後甲戌朱全忠引軍還

四年春正月壬寅朱全忠至大梁御史大夫薛貽矩賫詔往勞之二月壬子詔宰相帥百官齊詣元帥府勸進三月朱全忠以亳州刺史李思安為北路行軍都統以擊幽州夏四月己酉劉守光囚其父仁恭自稱盧龍節度使戊午錢鏐取温州甲子皇帝遜位于朱全忠全忠廢帝為濟陰王遷于曹州明年二月癸亥帝遇弒年十

七諡曰哀皇帝以王禮葬於濟陰縣之定陶鄉後唐明  
宗時就故陵置園邑追諡曰昭宣光烈孝皇帝陵曰溫  
陵

昭宣帝天祐

仍昭宗  
年號

三年

右唐二十帝合二百九十年



欽定續通志卷十八